

L'Avòt dal Friùl celebrât di Glesie Furlane (www.glesiefurlane.org) ogni an in occasione de fieste dai Sants Ermacure e Fortunât al è un apontament fundamentâl no dome dal pont di viste liturgjic, ma ançe e soredu parçè che al rapresente un moment par une riflession sul îr, sul vuê e sul doman dal popul furlan.

Cun di plui chest an, dopo de messe te Basiliche mari di Aquilee celebrade di bonsignôr **Rizieri De Tina**, bonsignôr **Roberto Bertossi** al à cjapade la ocasion par ricuardâ une date impuartantone propit pe associazion di cristians e furlans che a cirin di lâ a font des lôr lidris culturâls e religiosis, par podê conciliâ in maniere armoniche la proprie fede cu la proprie identitât culturâl.

"Chest an, juste ae fin di Avost, a colin i 40 agns de nassite di Glesie Furlane - al à annunciât Bertossi -. O stin preparant un apontament uficiâl par memoreâ chest aniversari e o varin maniere di visûs par timp in mert ai details".

Ma ce isal sucedût dal 1974? "Ai 28 di Avost di chel an bonsignôr **Battisti** arcivescul di chê volte e bonsignôr **Pizzoni**, ausiliâr e titolâr di Sant Pieri di Cjargne, a vevin invidât ducj i predis de Cjargne a Zui par celebrâ une messe te plêf mari di San Pieri - al spiege Bertossi -. Un trop di predis a àn domandât la messe par furlan, ma i vescui no àn acetât. Dîs predis a àn duncje firmât un document che a àn lassât sul altâr prime di messe e a son lâts fûr di glesie. E je scomençade cussì la lungje marce di Glesie Furlane".

Copie di chel document, titulât 'I predis cjargnei pal lôr popul', al è stât distribuît ancje ae fin de messe di Aquilee di chest an e leint i contignûts si gjolt in mò la atualitât e la fuarce di chês riis

Un grop di predis, ai 28 di Avost dal 1974, a àn domandât la messe par furlan e a àn firmât un document lassât sul altâr de plêf di Zui. La lôr bataie e va indenant in mò vuê.

» DI CHRISTIAN ROMANINI



La lungje marcje di Glesie furlane

butadis jù vint simpri iniments la peraule dal Signôr e il spirt dal Concili vatican II, event epocâl che al à ispirât chest sodalizi.

LENGHE DIRIT NATURÂL

Teme di fonde al è il reclam al dirit naturâl dal om di doprà la sô lenghe in ogni contest, ancje in chel religjôs, difindintlu a ogni cost, come che si pues lei intun dai passaçs plui significatîf dal test "Il Signôr che nus à clamâts (Zn 15,16) a passonâ, nus darà ancje la fuarce e il sintiment par

jessi pastôrs cussients. E se si va in rotis cun cualchidun? Al è miôr comprometisi tal ben che no tal mâl. Se o lin cuintri cualchi partît o il Vatican pal ben des pioris (i oms, ndr), o cjaparin une tonade in cheste vite, ma no in chê altre. Se invezit, par contentâ ducj e no sconsortâ nissun o varin pôre di mostrâ la muse e di doprà il baston e di difindi lis pioris, o restaron cence pioris e cence Diu, cuntun sbrendul ros che al brusarà cun nô intal cjadalgaul".



ilfriuli@ilfriuli.it

■ DAL CANADÀ

Fogolârs a congrès ator pal Friùl

Il Congrès dai Furlans dal Canada, in occasione dai 40 agns di fondazion de Federazione, che e met adun ben 16 Fogolârs, al è in program dai 23 ai 27 di Lui in Friùl.

Il teme dal congrès, dulà che a parteciparan passe cent delegâts dal Nordamerice al è "Scuvierzi lis nestrîs lidrîs" e si propon di ilustrâ ai partecipants, in particolar a chei di seconde e tierce gjenerazion che a vivin in Canada, no dome il Friùl dai lôr vons, ma in particolar chel contemporani e dinamic dal di vuê.

Duncje al sarâ un event itinerant. Lis voris efetivis dal congrès si son vertis joibe ai 24 di Lui aes 9.30, cu la cerimonie di scree tal Cjistiell di Udin, par dopo disvilupâsi intune schirie di visitis vuidadis su dut il territori de region e sierâs domenie ai 27 di Lui in Vile Manin di Passarian di Codroip cu lis celebracions dai 40 agns di fondazion coordinadis di **Primo Di Luca**.

SCOLTADIS DI DRIUS

Fruts piçui

Mi plasìn tant i fruts pizzui, soredu cuand che vain.

Cussì le mamute ju cjape sul braz e ju puarte vie.



Euronews informa

Riforme des autonomiis locâls, Fontanini: "Gnûf centralisim regionâl, inefficient e cjâr. A paiâ a saran i furlans".

Che la proliferazion des Unions dai Comuns, veris e propriis "piçulis provinciis", fulcri di riforme Panontin, e moltiplicarà i centris di spese a nivel regionâl, al è sot dai voi di ducj tant che e à vût criticis e osservacions di plui bandis. Leturis e consideracions al test de riforme a àn puartât l'assessor regionâl Panontin a tornâ indaûr rispjet aes intenzions iniziâls e, dut câs, a mostrâ disponibilitât al confront e a pussibilis revisions. Insome, ancje l'autôr dal document si sta forsint rindint cont che la propueste no à fondament? Parçè che, di fat, e je dome une operazion di façade e in plui dispendiose pe int de nestre region. Ma vignin ai aspiets technics. Cemût vignarano distribuîs lis competencis atuâls des Provinciis? Si contin plui di 150 e



scuasit dutis (lavôr, viabilitât, motorizazion civil, traspuart public, ambient, sport, culture, tutele des minorancis) a vignaran cjapadis sù de Regjon. Ent che al cambiarà inevitabilmentri piel. Di orghin legjislatîf e di programazion, come che al varès di jessi, a mostri amministratîf cun 4 mil dependents in fuarce intal organic. Cence contâ, aspjet ancjemò plui rilevant, il procès di centralizazion decisionâl che di sigûr si scontrarà cu lis esigjencis dai macroteritoris. Insome, un disastri annunciât, organizatîf e finanziari pe nestre region e pes istancis dal popul furlan. La Regjon no je nassude par davuelzi funzions di ent di prossimitât, no je nassude par rapuartâsi cui citadins,

no à la vocazion juste e nancje l'organizacion. Viodût che no jere in grât di puartâ indenant gnûfs compits a son stâts creâts gnûfs organismis: 'FVG Strade', ma ancje l'Agjenzie dal Lavôr e dopo A.R.P.A., A.R.D.I.S.S., A.T.E.R. Di cheste riforme des autonomiis locâls no je nissune valutazion dai coscj. Si podaran sparagnâ i coscj dai orghins atuâ di guvier des Provinciis, sù par jù 1,6 euro par abitant, ma trop costarano in plui ai citadins i dependents che a lavoraran in Regjon e in tai ents partecipâts? Trop costarà in plui il fat di scugnisi rapuartâ cu la burocrazie regionâl? Lis Provinciis a àn za fat i conts, ma si reste in spiete di chei de Zonte

regionâl, ancje parçè che dopo la Zonte stesse e varà di rispundi a la int. In spiete un consei. In ducj i granç País Europeans a esistin lis Provinciis e ancje a nivel nazionâl, cu la leç Delrio, a vegnin mantignudis, parçè a son in grât di garantî une rêt di servizis e politichis territoriâls. O sperî che dopo vè copât la democrazia, gjavant ai citadins il dirit di vôt, si salvin lis Provinciis tant che territoris, areis essenziâls tal sisteme istituzionâl, sociâl e economic talian par continuâ a garantî, cun coscj ridots, il svilup territorîal e servizis indispensabilis a ducj i citadins, ma ancje la tutele e la promozion des identitâts locâls, in tai comuns granç e tes piçulis comunitâts.